

老人權益中心

地址：荃灣沙咀道305號眾安大廈3字樓A1室 電話：(852) 2411 0196 傳真：2612 4222 電郵：greypower1997@yahoo.com.hk

長者津貼唔湯唔水 全民退保搞定唔搞？梁振英你咪行差踏錯！

作為老人權益中心主席，本人曾接觸過三任特首，董建華、曾蔭權和梁振英，他們個個都口說關心長者，但做事都是「講一套、做一套」，令人非常失望。

董建華：三老政策雷聲大 落兩收柴唔見晒

「董特首在 97 年上場個陣提出老有所養、老有所屬、老有所為嘅『三老政策』，我以為佢真正關心我地班老人家，點知佢搞來搞去『得個桔』，實情就乜都唔得，最後連隻『生金蛋嘅雞』都賣比領匯，我好心話想『敲醒佢』唔係話『敲死佢』，點知佢話腳痛下台，三老政策完全無晒聲氣。」

曾蔭權：全民退保 就話不設實際 做好份工 就係曾蔭權貴

「之後曾蔭權上台話要做好份工，佢做好份乜嘢工？今日清楚晒啦，就係做好『官商勾結』份工。佢前年仲話要『起錨』，我以為佢起乜嘢錨，唔通真係轉性聽民意搞全民退休保障，點知佢仲話我地『不設實際』！公務員就預留五千億做長俸，我地無話眼紅佢，不過希望所有市民都有退休保障。」

梁振英：長者津貼真係唔湯唔水 搞全民退保要認認真真

「梁振英我見過幾次，我話希望你要搞全民退休保障，一定要轟轟烈烈，唔好留番個爛子比下一代。佢仲話：『搞全民退休保障唔駛轟轟烈烈，認認真真就得啦』。之後唐英年同佢爭做特首都話要搞全民退休保障，我以為終於等到有人肯搞，點知講講吓變到將生果加到\$2200，但係又要審、又要查，咁即係『將隻雞換咗隻龜』，仲邊係全民退休保障呢？佢真係『請人食粥都要隔渣』！」

老人權益中心(下稱本中心)由一群貢獻香港社會一生的基層老人所組成，多年以來，本中心一直關注種種與長者權益有關的社會政策。面對社會人口老化和貧富兩極化日趨嚴重，現時每三名長者竟然就有一人活於貧窮，香港作為一個人均收入 21 萬元，總儲備人均 40 萬元的富裕社會，簡直「可恥」！我們認為出現這個情況，歸根到底就是特區政府一直迴避設立全民退休保障計劃。

長者生活津貼「做鹽唔鹹，做醋唔酸」

「梁振英一上場就搞個特惠生果金，社會批評佢『敬老』點解要審要查，佢轉頭就話係『扶貧』，扶貧做乜佢唔取銷『衰仔紙』，畀同仔女同住的長者獨立申請綜援呢？又點解唔搞『全民退休保障』呢？呢個『長者津貼』做鹽唔鹹，做醋唔酸，餓你唔死，幫你唔到，你話有乜用？張建宗仲發高燒，話你有錢嘅可以將錢轉畀家人，咁即係點呀，教市民明呢政府呀？扶貧係咁扶嘅咩？真係褲襠癩屎都唔知臭！」

梁振英斷錯症落錯藥 長津金只會越扶越貧

我們這一代長者為香港打拼了幾十年，香港繁榮我有份，卻臨老醫食有憂，正是「人又老、錢又無、身體又唔好、子女幫唔到」。你明知數以萬計長者寧願街頭拾荒，都不願又查又審「擺綜援」，令致家嘈屋閉，但梁振英偏偏不願面對問題的癥結。明眼人都見到，梁振英政府堅持要搞「唔三唔四、要審要查」的「長者生活津貼」，歸根究底就是不願搞「全民退休保障」。隨著人口老化和貧富兩極化，梁振英政府完全以公帑處理「退休保障」的問題，是「斷錯症、落錯藥」，因為「審查制度」不單幫不了以往不願申領綜援而有需要長者，而且錯過了這幾年搞全民退休保障的機會，只是將爛攤子留給下一代。

我代表中心一直關注的「邊緣老人」重申以下立場：

- 1) 要搞「長者生活津貼」就必須取銷審查制度，並作為「過渡方案」為籌備全民退休保障鋪路；
- 2) 新政府必須在任內就設立「全民退休保障計劃」提出方案，成立跨部門及高層次的機制，專責落實推行全民退休保障計劃。

老人權益中心主席 盧少蘭

2012 年 10 月 25 日